

## PEMINDAHAN MAKLUMAT

### Praktis 1

Pelbagai usaha yang proaktif harus dilakukan oleh pelbagai pihak untuk memajukan industri kraf tangan. Antara usaha yang dapat dilakukan termasuklah mengadakan promosi secara besar-besaran bagi menggalakkan pengusaha kraf tangan bergiat secara aktif. Dengan ini, sikap menghargai seni dan nilai barang kraf tangan dapat dipupuk dalam kalangan masyarakat. Usaha ini juga lebih dominan untuk meningkatkan produktiviti kraf tangan. Selain itu, pihak berkenaan harus memanfaatkan medium media sosial untuk menjual kraf tangan kepada anggota masyarakat. Para pengusaha kraf tangan harus bijak memanfaatkan medium media sosial untuk mengembangkan perniagaan produk kraf tangan hingga peringkat antarabangsa. Hal ini demikian kerana pembelian barang melalui talian sudah menjadi fenomena masyarakat yang ingin semuanya mudah dan cepat hanya di hujung jari. Seterusnya, agensi yang berkenaan wajar menganjurkan kursus dan pendedahan kepada pengusaha yang kurang mahir untuk memasarkan produk mereka. Kursus yang dianjurkan ini memberikan peluang kepada pengusaha untuk memahami pemasaran, terutama peringkat antarabangsa. Akhir sekali, pengusaha kraf tangan harus juga menghasilkan produk yang sejajar dengan aliran semasa. Oleh itu, kraf tangan yang dihasilkan perlu unik dan kreatif serta bersesuaian dengan cita rasa semasa tetapi mengekalkan keasliannya. Kesimpulannya, industri kraf tangan harus didedahkan kepada golongan muda kerana mampu menjana pendapatan.

### Praktis 2

Kemalangan di tempat kerja tidak harus dipandang ringan oleh semua pihak. Pelbagai langkah harus dilakukan agar kes kemalangan di tempat kerja berkurangan. Antaranya termasuklah para pekerja perlu menghadiri induksi keselamatan di tempat kerja. Dengan ini, para pekerja lebih peka terhadap aspek keselamatan serta mengamalkan budaya kerja yang berhemah. Pada masa yang sama, para pekerja di bengkel atau di tapak pembinaan wajib memakai alat perlindungan keselamatan. Pemakaian alatan keselamatan ini sedikit sebanyak dapat mengurangkan risiko kemalangan dalam kalangan pekerja. Selain itu, para pekerja harus mengendalikan mesin atau peralatan mengikut prosedur yang ditetapkan. Prosedur penggunaan mesin perlu dipatuhi untuk mengelakkan daripada berlakunya perkara yang tidak diingini. Kesimpulannya, para pekerja perlu sentiasa mengamalkan budaya kerja yang berhemah bagi mengurangkan kemalangan di tempat kerja.

### Praktis 3

Rajah menunjukkan jumlah kes demam denggi dari tahun 2012 hingga tahun 2017. Pada tahun 2012, sebanyak 21900 kes berlaku di negara kita. Bilangan ini paling sedikit mungkin kerana kesedaran yang tinggi dalam kalangan ahli masyarakat tentang bahaya denggi. Pada tahun 2015, bilangan kes demam denggi mencatatkan angka yang paling tinggi, iaitu 120836 kes. Hal ini mungkin disebabkan oleh ketidakcekapan pengurusan sampah di kawasan penempatan sehingga menyebabkan nyamuk aedes mudah membiak. Pada tahun 2017, bilangan kes demam denggi

semakin berkurang menjadi 83849 kes. Hal ini demikian kerana, usaha yang giat dilaksanakan oleh pihak Kementerian Kesihatan seperti penyemburan asap di kawasan pembiakan nyamuk aedes. Kesimpulannya, anggota masyarakat perlu mempunyai kesedaran untuk menjaga kebersihan bagi menangani kes demam denggi yang merupakan antara penyakit yang berbahaya.

### Praktis 4

Pameran Pertanian, Hortikultur, dan Agropelancongan Malaysia yang diadakan di Taman Ekspo Pertanian Malaysia (MAEPS), Serdang banyak menyumbang kepada kemajuan industri pertanian dan penternakan. Pameran ini dapat menonjolkan agroteknologi pertanian dalam industri agromakanan negara. Dengan itu, banyak produk makanan berasaskan pertanian dan penternakan dapat dihasilkan demi bekalan makanan negara. Selain itu, pameran ini menyediakan peluang kerjaya dan bidang keusahawanan yang dapat diceburi oleh penduduk. Dengan peluang tersebut, anggota masyarakat dapat meningkatkan taraf hidup mereka. Seterusnya, kita dapat mempamerkan produk pertanian, penternakan, teknologi, serta perkhidmatan agromakanan untuk pengetahuan orang ramai. Hal yang demikian dapat meningkatkan eksport hasil pertanian dan penternakan yang mampu menjana pendapatan negara. Kesimpulannya, pameran ini merupakan usaha yang efektif untuk membangunkan serta meningkatkan mutu sektor pertanian dan penternakan negara.

### Praktis 5

Permainan tradisional kini semakin dilupakan oleh anggota masyarakat. Pelbagai kepentingan mempopularkan permainan tradisional sehingga pihak kerajaan dan pihak swasta melaksanakan pelbagai langkah. Antaranya, permainan tradisional dapat dijadikan produk pelancongan yang memberikan manfaat kepada rakyat dan negara. Biasanya, kebanyakan pelancong yang berkunjung ke negara ini pasti ingin melihat keunikan budaya warisan. Selain itu, permainan tradisional dapat dijadikan aktiviti mengisi masa lapang secara berfaedah. Dengan ini, anggota masyarakat dapat menghindarkan diri daripada terjebak dalam aktiviti negatif. Permainan tradisional merupakan warisan budaya yang harus dipopularkan. Oleh itu, permainan ini perlu dikekalkan agar tidak lenyap ditelan zaman. Kita juga dapat menjadikan permainan tradisional sebagai sumber hiburan yang menyeronokkan. Tuntasnya, kita perlu mengembalikan kegemilangan permainan tradisional kerana permainan ini banyak kepentingannya kepada rakyat dan negara.

### Praktis 6

Iklan menunjukkan program Bina Jati Diri yang merupakan aktiviti cuti sekolah. Program akan diadakan selama tiga hari bermula pada 26 November hingga 28 November 2019. Murid yang berminat dengan program ini dikenakan bayaran sebanyak RM200 termasuklah makan dan minum. Penyertaan terbuka kepada murid umur 13 tahun hingga 16 tahun dan terhad kepada 40 orang murid sahaja. Pelbagai aktiviti diadakan sepanjang program ini berlangsung, iaitu bengkel sahsiah diri, aktiviti kecergasan, ceramah, dan menjelajah alam kita. Melalui program ini, murid-murid dapat meningkatkan jati diri demi kecemerlangan diri. Selain itu, program ini merupakan salah satu cara murid mengisi

masa cuti sekolah secara berfaedah. Kesimpulannya, para murid harus merebut peluang menyertai program sedemikian demi kecemerlangan diri.

### Praktis 7

Industri kecil dan sederhana (IKS) harus dimajukan dengan pelbagai langkah agar dapat meningkatkan ekonomi negara. Khidmat nasihat, modal, dan kursus tentang industri kecil dan sederhana harus dilaksanakan oleh kerajaan untuk menarik minat golongan muda melibatkan diri dalam IKS. Selain itu, konsep "Satu Daerah Satu Produk" dapat menggambarkan keistimewaan dan dentiti sesebuah daerah. Para pengusaha IKS perlu dibimbing tentang strategi penjualan dan pemasaran produk melalui laman sosial. Seterusnya, pengusaha industri ini juga perlu meningkatkan pengetahuan dan kemahiran serta penggunaan teknologi moden. Masyarakat juga harus digalakkan untuk membeli barangan IKS agar para pengusaha lebih giat mengeluarkan produk mereka. Di samping itu, media massa dapat mengembangkan industri desa dengan mempromosikan dan menyebarkan maklumat produk IKS. Industri ini harus dimajukan kerana dapat meningkatkan ekonomi negara.

### Praktis 8

Melalui pelancongan domestik, kita dapat mengenali dan memahami kebudayaan, adat resam, dan warisan negara. Dengan ini, perasaan bangga dan cinta akan negara timbul dalam diri kita. Selain itu, pelancongan domestik juga dapat menjana ekonomi negara serta menambahkan peluang pekerjaan dan perniagaan kepada rakyat. Di samping itu, pelancongan domestik juga dapat memberikan kesan terhadap industri pelancongan. Seterusnya, melancong dalam negara dapat merapatkan hubungan kekeluargaan kerana semua anggota keluarga bercuti bersama-sama. Kos melancong dalam negara juga agak lebih murah. Akhir sekali, pelancongan domestik mampu memupuk semangat patriotik serta memperkukuh jati diri rakyat.

### Praktis 9

Gejala gengsterisme semakin berleluasa dalam kalangan murid pada masa ini. Hal ini berpunca daripada sikap kebanyakan ibu bapa yang sibuk dengan pekerjaan dan aktiviti sendiri, selain terlalu menyokong dan memanjakan anak-anak. Di samping itu, segelintir pihak sekolah menyembunyikan kes-kes gengsterisme di sekolah kerana tidak mahu diketahui umum dan berpanjangan. Selain itu, gengsterisme berlaku kerana murid menyimpan dendam kepada rakan yang pernah membulinya. Seterusnya, pengawasan pihak pengurusan asrama yang lemah menyebabkan gengsterisme berlaku. Malahan, sesetengah murid pula bersikap pantang dicabar. Kesimpulannya, ibu bapa, pihak sekolah, dan polis haruslah bekerjasama bagi menyelesaikan gengsterisme dalam kalangan murid.

### Praktis 10

Kita wajar mencari dan mencuba pendekatan baharu untuk memartabatkan bahasa Melayu, terutama dalam kalangan generasi muda kini. Antaranya, kita meneruskan usaha mengangkat bahasa Melayu sebagai bahasa pengetahuan. Selain itu, bahasa Melayu digunakan dalam syarahan-syarahan perdana dan dalam situasi rasmi. Di samping itu, bahasa Melayu menjadi bahasa utama dan bahasa rasmi dalam sidang Parlimen, urusan pentadbiran, dan bidang perundangan. Pada masa yang sama, bahasa Melayu juga digunakan dalam bidang teknologi maklumat. Akhir sekali, institusi pengajian tinggi (IPT) perlu mengadakan kursus

yang berkaitan dengan kejuruteraan menggunakan bahasa Melayu. Kesimpulannya, kita patut mencintai bahasa ibunda kita sendiri.

### Praktis 11

Petikan ini membincangkan langkah-langkah mengawal penularan wabak COVID-19 yang melanda hampir seluruh dunia. Pergerakan Kawalan Pergerakan dilancarkan dengan melarang sebarang perhimpunan ramai. Selain itu, rakyat diarahkan agar kekal berada di rumah dan mengurangkan pergerakan sebagai usaha agar penularan virus ini tidak merebak secara berterusan. Selain itu, rakyat Malaysia dari luar negara yang pulang ke tanah air perlu melaporkan diri kepada pihak kesihatan, melakukan pemeriksaan kesihatan, dan menjalani melakukan kuarantin sukarela selama 14 hari. Kerajaan pula menyekat kemasukan pelancong dan pelawat asing di semua pintu utama negara untuk mengawal wabak ini daripada menular. Anggota masyarakat perlu bertanggungjawab terhadap diri dengan membersihkan diri dengan melakukan disinfeksi di sekitar rumah. Orang ramai juga harus menjarakkan diri semasa berada di luar rumah untuk mengelakkan sentuhan. Kesimpulannya, rakyat mestilah sentiasa mematuhi prosedur operasi standard (SOP) yang ditetapkan dalam usaha membantu negara mengawal penularan COVID-19.

### Praktis 12

Petikan memperkatakan punca-punca kemalangan jalan raya berlaku. Antaranya, sikap pemandu dan pengguna jalan raya. Keadaan kenderaan yang tidak berada dalam keadaan baik turut mengakibatkan kemalangan jalan raya. Selain itu, masalah teknikal juga menjadi faktor berlakunya kemalangan jalan raya. Seterusnya, kemalangan jalan raya berlaku berpunca daripada gejala perlumbaan haram yang berleluasa. Akhir sekali, penyebab kemalangan jalan raya yang lain ialah faktor bencana alam. Kesimpulannya, para pengguna jalan raya mestilah berwaspada ketika berada di jalan raya agar dapat menghindarkan kemalangan.

### Praktis 13

Petikan memperkatakan langkah-langkah untuk menggalakkan amalan berbudi bahasa. Antaranya ialah amalan berbudi bahasa diterapkan melalui penggunaan kata sapaan. Seterusnya, kita mengambil langkah menyuburkan penghayatan berbudi bahasa kepada pelbagai golongan. Di samping itu, kita mewujudkan anggota masyarakat yang mengamalkan kelakuan terpuji dan amalan murni. Langkah-langkah untuk menggalakkan amalan berbudi bahasa yang lain ialah amalan berbudi bahasa disemarakkan dalam kehidupan harian dan membudayakan warisan nenek moyang dalam hubungan sesama anggota masyarakat. Akhir sekali, usaha tersebut ialah rakyat dan kerajaan saling membahu bagi mewujudkan masyarakat yang berhemah. Ironinya, amalan berbudi bahasa dalam kalangan masyarakat perlulah diamalkan secara berterusan.

### Praktis 14

Petikan membincangkan persepsi remaja terhadap bidang pertanian. Remaja menganggap pertanian tidak menjamin masa depan. Selain itu, kebanyakan remaja mengidamkan kerjaya dalam bidang profesional. Seterusnya, sesetengah ibu bapa menasihati anak-anak agar tidak mewarisi bidang pertanian. Pada masa yang sama, ibu bapa membina imej bahawa bidang pertanian untuk orang yang gagal dalam akademik dan orang kampung sahaja. Kesimpulannya, bidang pertanian tidak kurang pentingnya dengan industri lain.